

佛本行集經卷第五十

嚴十

隋天竺三藏法師闍那崛多譯

說法儀式品第五十二

爾時復有衆多外道波離婆闍迦五日五日
恒常集聚爲人說法衆人大集詣彼聽受以
是因緣諸外道輩波離婆闍迦等得大利養
恭敬尊重於彼時間王舍大城摩伽國王頻
婆娑羅於佛法中深生正信作如是念今者
外道波離婆闍迦五日五日恒常集聚爲他
說法多有人衆詣彼聽受以是因緣諸外道
輩大得利養世人貴重供養恭敬我於今者
亦集諸師五日五日勸令說法我應自往詣
彼大會彼大會內若見我來時一切人民悉
應來集如是因緣應令我師大得利養世間
尊重思惟是已至於佛所具白斯事爾時世

尊因此起發集比丘僧而告之言汝諸比丘
我今已許五日五日令汝等輩集聚大會爲
他說法談論法義時諸比丘白言世尊何法
當說何法不說時諸比丘問此事已佛告大
衆諸比丘言汝等比丘我今已許五日五日
於其中間集聚衆已歎佛功德歎法功德歎
僧功德歎信功德乃至略說讚歎戒行多聞
功德歎行布施歎行智慧歎行知足歎行少
欲歎說頭陀歎說遠離聚落城邑常在空閑
歎行妙行讚歎利益歎行精進讚歎供養父
母尊長供養沙門及婆羅門讚歎供養諸善
知識歎說善言讚歎調伏諸根門者讚歎節
量諸飲食者讚歎初夜及以後夜省睡眠者
讚生正念讚相奉事讚相諮詢讚聞領悟讚
受師教而不違背聞已奉行讚聞法已而能

正知讚聞正法順法而行歎說念佛歎說念
法歎說念僧歎說念天讚說念施歎念寂滅
歎念阿那波那歎說念身讚歎恒念不淨觀
想歎念死想歎念飲食作不淨想讚歎世間
不可樂想讚無常想讚苦空想讚無我想讚

蒙十

歎斷想讚離欲想讚歎滅想及以讚歎觀白
骨想讚歎骨離想讚歎脣脹想讚歎欲壞想
讚歎半噉想讚歎散想讚半燒想讚燒赤想
讚可惡想亦應讚歎念諸功德亦應讚歎四
正勤四如意足五根五力七覺道分讚解脫
門諸解脫分讚八勝處讚歎三明亦應讚說
六通功德

爾時諸比丘作如是念如來已許聽我等輩
五日五日聚集大會應當讚說諸佛功德乃
至讚歎說六神通諸功德等彼諸比丘五日

五日遂即集聚同發一聲讚佛功德乃至讚
說六神通等功德之事於時諸人各來聽法
是時即有談論毀呰作如是言我等諸師云
何同出一音說法譬如初學諸童子輩合聲
唱讚無有異也時諸比丘聞此諸人毀呰道

說來詣佛所白如上事爾時世尊告諸比丘
作如是言汝諸比丘從今已去制諸弟子不得
同聲讚說法義唯請辯才堪說法者爾時
諸比丘或復請彼諸根闇鈍及缺漏者不具
諸戒而演說法乃至衆人更復毀呰種種道
蒙十說情不喜樂而口唱言是諸師輩尚作如是
況非師者時諸比丘聞是事已具往白佛爾
時佛告諸比丘言汝諸比丘我從今日制諸
弟子不得請於諸根闇鈍及以缺漏戒不具
者而說其法從今以後若請說法應請妙行

具足之人於諸衆內勝行成就乃至佛復唱
其制言應當簡擇辯才知法次第舊解阿含
經等請令說法乃至衆中多解阿含佛復告
彼諸比丘言非但唯解阿含經者須請說法
復解修多羅及解摩登伽者應請是人爲衆
說法若大衆中有諸比丘解修多羅及解毗
尼解摩登伽又於是中應當選擇文字分明
具足辯才又於衆中現在比丘多解文字分
明辯才悉具足者我今當聽是等比丘得從
下坐次第差遣爲衆說法若一人乏者更請
第二第二疲乏應請第三第三疲乏應請第
四第四疲乏應請第五乃至若干堪說法者
次第應請爲衆說法有諸比丘或在露地說
法之時或寒或熱我許造堂堂下說法若雖
有堂露無四壁風吹塵草汗諸比丘我今當

聽起四壁障遮諸塵草時諸比丘在說法堂
若地不平應以種種若麻若草泥塗其地使
令淨好爾時諸比丘起說法堂泥地已訖在
說法堂誦習經行以塵汙足聽許比丘應須
洗足是時比丘數數洗足腳足痛故乃至佛
告諸比丘言應以香湯灑地滅去塵埃滅塵
埃已其地亦乾還汙其脚乃至佛復告諸比
丘我當聽許牛糞香水以塗堂地於時水乾
牛糞散壞還復汙足佛復告諸比丘應取軟
草或復麻等以敷地上爾時衆人見彼法師
卷十
辯才具足能演說法即持香華而散其上時
四
諸比丘不受其法而生厭離何以故以佛斷
故出家之人不得將持塗香末香及諸香鬘
時諸人輩聞見此事毀訾說言是等比丘如
是供養尚不堪受況復勝者時諸比丘以如

是事具徃白佛爾時佛告諸比丘言汝諸比丘若其有諸白衣檀越以歡喜心以吉祥故持種種香華塗香末香及諸華鬘散法師上者應當受之是時白衣諸檀越等遂將種種資財寶物及袈裟等供養法師是諸比丘恐懼慚愧不受彼物世諸人輩毀訾談說是輩沙門諸釋子等若干輕物尚不堪受況復勝者爾時諸比丘聞是事已具徃白佛爾時佛告諸比丘言汝諸比丘若有俗人持諸財物及袈裟等奉施法師爲歡喜故我許捨施若有須者聽其受取若不須者我許送還爾時諸比丘於說法時取大部黨闍誦者多或復一月不能得竟正欲休罷恐怖慚愧正欲誦徹身心疲殆時諸比丘具白上事爾時佛告諸比丘言爲衆說法應當知時爾時諸比丘

說法之時以微妙音演說法義時有比丘恐怖慚愧具白世尊爾時佛告諸比丘言我今聽許以微妙音而演說法於時比丘取諸經中要略義味而爲他說不依次第於時比丘慚愧恐怖慮違經律具以白佛於時佛告諸比丘言我許隨便於諸經中擇取要義安比文句爲人說法但取中義莫壞經本於是法師說法之時大衆集會其聲不顯不能令衆愛樂歡喜時諸比丘具白世尊佛告諸比丘我今已許於大衆中敷設高座應請法師昇座說法令衆悉聞又時聚會其衆更大說法諸師聲猶不徹時諸比丘復往白佛爾時世尊告諸比丘當須更倍敷設高座使說法者昇是座上爾時大衆倍更增多聲猶不徹時諸比丘復往白佛佛言我已聽許比丘或立

或行隨便說法時諸比丘集一堂內有二比丘演說經法是故相妨即造二堂二堂之內各別說法猶故相妨此堂之內將引比丘往詣彼堂彼堂之處有諸比丘迭相誘接令詣此堂往來交雜遂乃亂衆人或去來法事斷

絕或有比丘立於此法門不喜聞說時諸比丘具以白佛佛告諸比丘自今已去不得一堂二人說法亦復不得二堂相近使聲相接以相妨礙亦復不得彼詣此衆此詣彼衆亦復不得憎惡法門不喜聞說若憎惡者須如法治之是時衆中無有法師諸比丘等具以白佛佛告諸比丘若無法師應請誦者昇座誦之是時衆中無誦經者而諸比丘具以白佛佛告諸比丘我今聽許次第誦之或從上坐次第差誦或從下坐次第差誦乃至讀誦一

四句偈爾時諸法師讀誦經時猶如俗歌而說其法是故爲人毀訾譏論如是說法似我俗人歌詠無異剃頭沙門豈如歌詠而說法也時諸比丘聞是事已具將白佛佛告諸比丘若有比丘依世歌詠而說法者而有五失何等爲五一者自染歌聲二者他聞生染而不受義三者以聲出沒便失文句四者俗人聞時毀訾譏論五者將來世人聞此事已即依俗行以爲恒式若有比丘依附俗歌而說法者有此五失是故不得依俗歌詠而說法也汝諸比丘其有未解如上法者若所遊止應先諮詢和尚阿闍梨等時有比丘欲詣他方城邑聚落爾時和尚阿闍梨等語彼比丘如是長老汝不須往時彼比丘遂不取語而詣彼去至於中路逢值劫賊執捉比丘以手

及脚打蹋甚困唯留殘命劫奪衣鉢然後放之時彼比丘既得迴還僧伽藍處告諸比丘具陳此事時諸比丘將此白佛爾時世尊因是事故召集衆僧而告之言汝等比丘和尚阿闍黎實不許汝詣遠聚落遊行以不時諸比丘白言如是實不許也佛復告諸比丘汝等當知此事不善和尚阿闍黎既不許可何故自專詣他聚落諸比丘此有因緣所以者何我念往昔此閻浮提內五百商人是商人中有一商主名曰慈者最爲導首時諸商人皆共集會各相議言我等今可辦具資糧入海之具詣彼大海爲求財故必應當獲種種珍寶來還其家所謂摩尼真珠珂玉珊瑚金銀如是等寶使我等輩七世已來家內大富住持資物養育眷屬多作基業爾時彼等五

百商人具辦所須入海貨物有三千萬持一千萬擬道路中資用糧食又一千萬與彼商人以爲本貨第三千萬擬治舟船及船師價具辦是已各各安心受八關齋既受齋已各至已家辭別父母妻子眷屬於時慈者遂詣母所具諳是事其母是時在樓閣上新洗沐髮受八關齋持法安靖爾時慈者至於母前作如是言善哉父母我欲入海求諸財寶至於彼處持種種貨而來還歸所謂摩尼真珠玻璃乃至金銀欲使我家如此財寶住持七世資用無窮富饒具足供養父母及諸妻子復用布施營諸功德爾時慈者商主之母告慈者言兒今何用入大海中汝今家內大富豐饒財物具足凡有所須皆應無缺七世以來堪得存濟以充供養兼得行檀作諸功德

愛子愛子大海之內有諸恐怖所謂潮波惡風之難低彌羅魚海神縛怖羅刹女怖愛子慈者大海多有如是等難我今年老衰暮已至愛子若去與汝相見此事實難我今雖復少有殘命死日至近如是再三懇懃切語是時慈者重白母言善哉阿母我必詣海爲求財故至於彼所持種種寶必望歸還所謂摩尼真珠乃至金銀將來供養父母師長行檀布施廣修功德作是語已即欲進發爾時慈者商主之母從坐而起抱持慈者而告之曰愛子慈者我不許汝詣於大海而求財也何以故我今家內多有資財無所乏少爾時慈者作如是念我母今者不喜於我益當損敗而於今日更不許我入海求財我於今日必作禍敗以是因緣便生瞋恚遂撲其母置於

地上打其母頭即從家出共諸商人行到海岸既到海已祭祀海神嚴整船舶別顧五人三倍與價其五人者所謂執尾執棹杼漏能沉能浮善行船者共量所宜遂乘船舶入於大海爲求財故彼等諸人至於海內其船破

壞五百商人悉皆沒水唯有慈者商主一人得活爾時慈者於彼破船捉得一板即依其板運手動足極盡筋力因其風勢從海濤波落於一渚其渚名曰毗尸波提婆此云化諸是時慈者在彼化渚食諸果子及以藥草少時活命於後慈者遊歷彼渚至於南畔見有一路遂從彼道行至少地便即遙望見一銀城其城可喜微妙希有觀者無狀樓櫓却敵隍塹圍繞天窓欄楯及諸寶閣臺殿宮舍偏梁閣道上覆寶帳以種種寶而莊嚴之懸雜幡蓋

豎立寶幢香案香爐燒衆妙香其城周市有諸園林泉池渠流皆悉具足娛樂之處在彼城內正處中央有一寶殿名曰喜樂其殿微妙七寶所成所謂金銀瑠璃碑礪碼瑙琥珀真珠等寶爾時彼城有四婦女從城而出端正可喜觀者無狀最勝最妙以諸瓔珞而莊嚴身詣慈者所而言曰善來慈者何能冒涉來至此城此城無主衆物具足無所乏少於此城內有一寶殿名曰喜樂七寶所成我等四女居其殿內早起夜卧志意清潔言語貞良容儀婉媚聲氣和雅是故汝今可入此城昇於寶殿共相娛樂無男之處共受欲樂和合而行隨意止住我等於汝持一切物承事供養爾時慈者遂入彼城詣向寶殿無男之處共彼四女以五欲樂隨意歡娛經歷數

年經數百年經數千年縱情受樂於彼後時其四婦人告慈者言善哉聖子汝可住此莫向餘城爾時慈者即生疑慮云何此女而語我言聖子今可在此城住勿向餘城我今竊可遠此婦人伺其睡卧乘依此路至於別所東西馳訪當自證知竟有何事若善若惡既覺知已應如法行爾時慈者伺彼婦人睡眠著時安徐而起從寶殿下巡歷而行從東門出圍繞是城周市繞已至於南面見有一道即尋是道漸行而進遂復遙見有一金城端正可喜乃至篇十周市有諸泉池渠流盈滿於彼城中有一寶殿名曰常醉微妙可觀七寶所成所謂金銀乃至碑礪真珠等寶爾時彼城有八婦人從城而出可喜端正最勝最妙以諸瓔珞莊嚴其身來詣慈者商主之處到已

白言善哉慈者何能遠至復言慈者此城都是真金所造一切衆物資財具足其城中央有一寶殿名曰常醉七寶所成我等八女早起晚眠乃至慈者亦入彼城昇於寶殿共彼八女無男之處以諸五欲具足受樂共相娛樂經於數年數百年隨意而住後時彼女告慈者言聖子慈者汝莫從此去至餘城爾時慈者亦復驚疑尋即盜出處處遊觀乃復遙見一玻瓈城可喜端正觀者無狀彼城處中有一寶殿名曰意樂微妙可喜七寶所成金銀瑠璃乃至真珠爾時彼城乃有婦女一十六人從城而出形容端正觀者無狀諸寶瓔珞莊嚴其身乃至亦復白慈者言善來慈者何能冒至又言慈者此城純是玻瓈所成衆物具足其城處中有一寶殿名曰意樂亦

以七寶之所成立我等諸女一十六人早起晚卧如前請住爾時慈者即入彼城昇於寶殿共十六女無男之處具受欲樂以相娛樂經於數年數百年爾時諸女又語慈者慎莫東西慈者亦疑即違彼出遊歷漸進又復遙見一瑠璃城可喜端正四壁牢固乃至周匝泉池流水溝渠盈滿爾時彼處有一寶殿名曰梵德可喜微妙七寶所成城中復有三十二女從城而出端嚴可喜觀者無狀微妙殊特以諸瓔珞莊嚴其身語慈者曰善來聖者冒能遠至又言慈者此城皆是瑠璃所成衆物具有我是清潔行無違失常先啓自然後方爲心意和善言語風流今來詣汝願入此城昇於寶殿共相娛樂具足五欲和合受樂凡所須者我當詣奉爾時慈者入彼城中

昇於寶殿共於彼女三十二人無男之處具受欲樂經於數年經數百年數千百年意喜而住爾時彼諸三十二女復白慈者善哉聖子汝今慎莫從此城出諸於他城爾時慈者便復生疑如是籌量此等諸女云何語我作如是言聖子慎莫從此城出至餘城也我今可伺諸女睡時乘依此路安徐而去若善若惡到已應知既知見已如實應行爾時慈者伺彼諸女睡眠著時徐徐緩起下殿而去出城東門巡繞彼城詣到城南見一道路見已遂復乘彼而去須臾遇見有一鐵城其城四面皆各有門時彼城中無有一人若男若女童男童女出迎慈者唯聞是聲誰飢誰渴誰裸露者誰急走者誰從遠道疲乏者誰我乘者如我今者若入此城即知是聲誰所作也爾時慈者即入彼城入彼城已四門尋閉爾時慈者心懷恐懼身毛皆豎處處逃走作如是言我今敗也我今壞也而彼處處逃走之時見有一人頭戴鐵輪其輪赫赫狀如猛火其火炎熾甚可怖畏遂詣彼所問言仁者汝是誰也汝頭上輪誰所轉也何故炎赫熾然可畏猶如火聚時彼罪人報言仁者汝今

知不我是商主名瞿頻陀爾時慈者又問彼言汝於往昔作何罪業以彼造罪業因緣故有此鐵輪如是熾猛如是炎熱轉在頭上彼人報言我於昔日以瞋怒故打蹠母頭以如是業罪因緣故受大鐵輪如是猛熾如是赫炎轉在頭上爾時慈者聞此語已悲啼號哭悔過自責憶省自業口作是言今我被禁如鹿入檻爾時彼城有一夜叉業守彼城名婆流迦在彼城中時彼夜叉從彼商主瞿頻陀邊取其頭上熾然火輪取已串著慈者頭上爾時慈者頭上鐵輪甚大炎赫極受大苦極燒極然其苦難忍即時以偈問夜叉言此城周帀四門所常有光炎恐怖人我今已被如此縛猶如諸鹿入深檻善哉乞問夜叉王是輪何故與我著

熾然猛炎如火聚今將令我身命斷我先經於喜樂殿復入金城常醉宮又經玻瓈意樂處最後所遇名梵德先入銀城有四女後至金郭復遇八玻瓈城女有十六又至瑠璃三十二如是值彼復值比既得值遇如是者次第值已轉更勝由我貪欲不知足云何今值恐怖輪我昔爲更作何業值此鐵輪頭上旋熾然輝赫如火聚今將令我身命斷願夜叉王哀愍答經幾歲數受斯輪爾時夜叉業守城者即便以偈告慈者言昔時汝母持淨戒汝以腳足蹠其頭以如是等業因緣今爲鐵輪頭上轉熾然猶如猛火聚光輝炎赫甚可畏

輪轉在於汝頭上 令汝身命斷更斷
於斯滿足六萬年 終無歲數闕減者
此輪常在汝頭上 如是事實終不疑
爾時世尊即說偈言

若有知識與彼利 彼乃反更與其禍
彼則後受如是殃 最十 猶如慈者懷瞋恨
不應與惡反與惡 不應與罪更與罪
彼則後受如是殃 十四 猶如慈者懷瞋恨
若興慈心反覓便 於恩德處不報恩
彼則後受如是殃 猶如慈者懷瞋恨
業力將人處處經 業力自近牽將去
非地非空非海中 亦非山間巖石裏
一切無有地方處 能使脫之不受業

佛告諸比丘汝等比丘於意云何是時慈者

豈異人乎勿作異見即我身是我以彼時欲
入海故受八關齋戒以彼業報因緣力故得
值如是四種寶城一切諸物皆悉具足無所
乏少由於惡心瞋恨因緣踰母頭故具足經
由六萬年歲受大鐵輪熾然之苦汝諸比丘
因業報應非虛空受但是衆生造善惡業隨
業因緣而受是報是故諸比丘應須受業清
淨身業清淨口業清淨意業諸比丘若有比
丘身自愚癡不辨罪福善不善等應當諮詢
師長和尚阿闍黎等於後乃行城邑聚落若
和尚阿闍黎而不許可自專去者應當如法
治其不敬不孝順罪

佛本行集經卷第五十

音釋

訾毀也

音紫

口

瞋恚

音昌

眞

切

怒

視

也

恚於避切恨怒也